

Dia Internashonal di Klamidia

Nos tur sa di dia internashonal di AIDS. Ma kuantu di nos a yega di tende di dia internashonal di Klamidia? Ningun! Un dia asina no ta eksistí.

Kua malesanan transmití seksualmente (MTS) ta eksistí na nos islanan? Kua enfermedat venérikó ta esun mas komún na nos islanan? Poko hende sa kontesta pa e preguntanan aki. Ma nan sa bon di AIDS.

Echu ta ku ningun MTS ta mas komún na nos islanan ku Klamidia. Echu tambe ta ku gran mayoria di e poblashon di nos islanan tin ningun klase di idea kiko Klamidia ta. Echu ta ku nos no tin un dia di Klamidia na nos islanan.

Promé ku 1976, tempu ku el a ser deskubrí na Suisa, Klamidia tabata desconosí. Ma awor Klamidia ta e malesa venérikó mas komún ku hende seksualmente aktivo ta kontagiá.

Segun sífranan di algun aña pasá, tin 4 mion kaso nobo di Klamidia kada aña. Ta kalkulá ku 20 te 40% di hende soltero ku ta seksualmente aktivo ta infektá ku klamidia. Tineidjernan tin chènsmas grandi pa kontagiá Klamidia. Sífranan ta indiká ku entre 16 te 39,3 porshento di tineidjernan ta infektá. Hulanda ta kalkulá ku tin 60.000 kaso *nobo* di Klamidia kada aña. E enfermedat aki ta representá mas ku mitar di tur e 110.000 kaso nobo anual di malesanan transmití seksualmente.

Klamidia ta espesialmente serio pa muhénan hóben. Un dama adulto ta benefisiá muchu mas di antibiótika ora e tin un enfermedat di inflamashon pèlviko ku un mucha muhé tineidjer ku e mésun malesa. Sífranan ta indiká ku 14% di mucha muhé tineidjer ku e malesa aki mester saka matris.

Hopi hende infektá ku Klamidia no tin síntoma mes. Nan por ta infektá pa hopi aña sin sa. Ochenta porshento di hende muhé no sa ku nan tin Klamidia te ora nan ta sinti un òf otro komplikashon físiko.

Tin remedi pa Klamidia: tetracycline òf doxycycline. **Ma ningun hende ta tuma remedi sin sa nan tin un enfermedat.** Pasobra Klamidia tin poko síntoma. Hopi biaha e enfermedat ta hasi su daño kuchi kuchi mientras e persona ta kere e ta bon di salú. Tin chènsmas grandi ku e bakteria ku ta kousa Klamidia, *chlamydia trachomatis*, ta hasi daño na e órganonan di reprodukshon di e dama, kousando infertilidat. Ku ún infekshon di Klamidia, e dama tin 25% chènsmas di bira infertil. E segunda infekshon ta hasi sterilidat 50% mas probabel. Ets. Ta bisá ku 75% di tur hende muhé ku ta kontagiá enfermedatnan di inflamashon pèlviko okashoná pa Klamidia, lo mester haña tratamentu ekstraordinario pa nan por sali na estado. **E dama ke haña yu, ma no por!**

Médikonan ta konsehá hende muhé ku ta seksualmente aktivo pa laga hasi un tèst pa Klamidia sikiera kada aña. I esaki sigur ta importante pa hende muhé mas hóben. Esnan ku tin mas chènsmas di kontagiá e enfermedat venérikó aki ta hende bou di 35 aña di edat.

Bo por evitá tur malesa venérikó si bo hasi loke bo Kreador a instruí. Tur relashon seksual fuera di matrimonio ta piká... inmoralidat! Beibel ta bisa, “*ma pa motibu di inmoralidat, laga kada hòmber tin su mes esposa, i laga kada muhé tin su mes esposo*” (1 Korintionan 7:2). **Ma hopi hende ta insistí pa hasi loke nan mes ta haña ta bon...i ta sufri e konsekuensianan. MTS sigur ta un di e konsekuensianan di desobediensia na Palabra di Dios!**

Dia internashonal di AIDS talbes tin su importansia. E dia aki ta usá pa konsientisá hende di e plaga ku ta asotá nos mundu. Ma si esei ta e kaso ku AIDS, pakiko nos no por tin un dia pa konsientisá nos polbashon di e MTS mas komún na nos islanan ...un dia di Klamidia?